



Uunga siunnersuut: Sulisoqarnermut akitsuut pillugu Inatsisartut inatsisaata allangortinneqarnera pillugu Inatsisartut inatsisaat nr. xx af xx. xxx 2020-meersoq. (Erninermi aningaasaateqarfimmik aningaasalersuinissaq il.il.)

(Aingaasaqarnermut Naalakkersuisoq)

(Siullermeerlugu oqaluuserineqarnera)

Uunga siunnersuut: Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaat nr. xx, xx. xxx 2020-imeersoq.

(Isumaginninnermut, Ilaqutariinnut Inatsisinillu Atuutsitsinnermut Naalakkersuisoq)

(Siullermeerlugu oqaluuserineqarnera)

Aallaqqaasiutigalugu Naalakkersuisut qutsavigissavakka inatsisissatut siunnersuutip saqqummiunneqannginnerani sukumiisumik suliaqarsimanerannut.

Erninermi aningaasaateqarfiliornissamut siunnersuummut Demokraatit imaattumik oqaaseqaateqassapput;

Isertuutissanngilara Demokraatiniit erninermi aningaasaateqarfimmik pilersitsinissamut tunngasoq nalorninartoqartissimagatsigu. Ernumagisimavarput, aningaasaateqarfimmut akiliutit inuussutissarsiornermut qanoq kinguneqarsinnaanersut. Takusinnaavarput suliffeqarfiit namminersortut pisariaqartitaat tusarnaarneqarsimasut, taamaasillutik angajoqqaat suliffeqarfinni nammineersortuni suliffeqartut ernereernerminni pilersuisinnaanissaminnut naammaginakannersumik qulakkeerneqarsimasut. Ilaqutariinummi taakkununga atugassarititaasut pitsanngorsarnissaat inissaminiippoq.

Nuannaarutigaarput ima ilusilersorneqarsinnaasimammat suliffeqarfiit, angajoqqaat meerartaareernerminni sulinngiffeqarnerani akissarsiaasa 80%-iannik utertitsinissamik qinnuteqarsinnaasunngorlugit. Tamanna nuannaarutigaarput, taamaasilluni suliffeqarfiit kisimik akiliisassanngimmata.

Aamma nuannaarutigaarput, bestyrelsi ilaatigut suliffeqarfimmi illuatungerisanik inuttaqartinneqarnissaa, taamaaliornitsigut qulakkiissagatsigu, siunnessami akissarsiaassap qaffasissusissaanut sunniuteqaqataasinnaasarpur. Taamaattumik pitsaalluinnarpoq, akissarsiaassap qaffasissusissaa ukiut tamaasa aaliangerneqartarpat Aingaasaqarnermut inatsimmi bestyrelsip innersuussinera apeqqutaalluni. Eqqaamassavarput, aningaasaateqarfik sinneqartoorfiussanngimmat, pisariaqartitsinerli malillugu aningaasalersorneqartussaammat. Taamaattumik pingaartuuvuq, aningaasaateqarfimmi sulineq pikkorissunik ingerlanneqartussaammat, taamannami anguniarneqartutut paasigatsigu.

Naartunermi, erninermi meeravissartaarnermilu sulinngiffeqarnissamut siunnersuummut Demokraatinit ima oqaaseqaateqassaagut;



Nuannaarutigaarput Inatsisartuni ilaasortarisimasarput Randi Vestergaard Evaldsenip angajoqqaanngorlaat sulinggiffeqarnerisa sivitsornissaanik siunnersuutaa kiisami piviusunngortussanngormat. Suliarujussuanut qujaffigaarput.

Nuannaarutigaarput siunnersuutit inernerisimammagu, naartunermi, erninermi meeravissartaarnermilu sulinggiffeqartarnermut inatsisip pitsanngorsaatissaanik allanik aamma suliaqartoqarsimammatt, tassani agajoqaat sulinggiffeqartarnerisa sivitsorneqarnissaanik allannguutissatut siunnersuutip oqallisigineqarnera partiit akimorlugit Inatsisartut ilaasortaasa akornanni. Tusarnaartoqarlunilu sulisoqarsimavoq angajoqqaanngorlaat pitsaaneerusumik sullikkumallugit. Tamannalu aamma atuuppoq angajoqqaanut meeraannut meeravissiaannullu tunngasunut.

Nuannaarutigaarput siunnersuummi siunniunneqarmat, angajoqqaatut sulinggiffeqarnerup eqaannerusumik atorsinnaanissaa ataataaguni anaanaaguniluunniit. Tamanna uagut Demokraatiit sorsuutigisimaqaarput. Sulinggiffeqarnermi sapaatit akunneri sisamat kingullit ataatasumut anaanaasumullu eqaannerusumik atorneqarsinnaalerneru sakkuvuq tigulluarneqarnissaanik neriuutigisarput. Anaanaasut erninginnerminni sapaatit akunneri sisamat sioqqullugit sulinggiffeqarsinnaalerput, imaluunniit ulloq taanna erniartorlutik illoqarfitsik qimallugu aallarnerminningaanniit. Ataataasut ernereernerup kingorna sapaatit akunneri pingasut sulinggiffeqarsinnaalissapput. Angajoqqaat erninermi imaluunniit sulinggiffeqarnermi meeqqaminnik annaasaqartut minnerpaamik sapaatit akunnerini sisamani sulinggiffeqarsinnaalissapput. Neriuppuguttaaq, siunissami ilaqaariit meeqqaminnik annaasaqartut allatigut pitsaaneerusumik ikiorsersinnaalissallugit, sulinggiffeqarnissaat kisiat pinnagu.

Pingaartumik nuannaarutigaarput, ullormusiat naatsorsorneqartarnerat allanngortinneqarmat. Siunissami sulinggiffeqannginnermi sapaatit akunneri kingullit 13-nit agguaqatigiisinneqartalissapput, piffissat suliffiusimanngitsut imaluunniit napparsimasimanerit il.il. ilanngunneqaratik. Tamanna angajoqqaat aningaasaqarniarnerannut annertuumik pitsanngorsaataassaaq.

Angajoqqaarsiat, angajoqqaat suiaaqatigiit, angajoqqaavissiat allarpassuillu pitsaanerujussuarmi atugaqartitaalissapput uuma inatsisissatut siunnersuutip atuutilerneratigut, taamaattumik siunnersuut Demokraatiit soorunami tapersorparput.

Naalackersuisut isumaqatigaagut, pitsaasumik inerneqartussanik allannguutinik saqqummiussisoqartoq. Allannguutit sivisuumik utaqqisimasagut, qilanaarpugullu.

Taamatut oqarluta Ilaqutariinnut- peqqinnissamullu ataatsimiititaliamut siunnersuutip aappassaaneerneqarnissaanut ingerlateqqipparput.